

Transkription von Urkunde KOL 1368a

Ort, Datierung: Kolberg, 1368-03-19

Signatur: Landesarchiv Greifswald, Rep. 38b U, 51 (Plathe)

Inhalt: Hinrik van der Osten: Rentenbeleg

In godes namen Amen . Wý hinrik van der osten Rydder wonende úppe deme hûse thû plote
bekennen vnde bethughen / openbare vor al de ienen de desse ieghenwardighe scrift seen oder horen .
Dat wi van vser vnde vser erfnamen weggen / vorkoft hebben vnde vorkopen an desser
ieghenwardighen scrift . wares rechten . Redeliken kopes . den armen lûden / de in des hilgengestes
hûse sint in der stat thû Colberghe vnde eren vormûnderen . ieghewardich . vnde thokomen=/de .
verundetwintich mark pennynge ewigher rente . up thoborende hir negest alle iar . vte deme dorpe
tor spie / vnde van den houen de dartho lighen . vor drûddehalf hûndert mark wonliker pennynge .
De vns mit reden pen/nynghen betalet sýn . vnde an vse vnde vser erfnamen Nutte behof komen sin .
alse inbetalinghe vser sculde / vnde hebben vor koft vnde vor kopen dit vor nomede dorp vnde rente .
vng(eroret) alles denstes bede . vnde mûntepennynge / vnder aller vnplicht . mit alleme rechte .
hogestes vnde mynnestes . alse hals vnde hant . vnde alles anderen rechtes . mit / wische . weyde .
ackere búwet . vnde vnghebúwet . mit wolden . búschen . brúken . torue . wateren water vlút .
vischerie / molen . vnde molen rente . mit krughen alrede buwet vnde deme noch búwen mach . vnde
mit aller rechtycheit / vrucht vnde nû . vnde mit alleme dat dar af komen mach . Alse dat sùlue dorp
. an synen sceiden vnde enden / heft begrepen . vnde alse it tho vns komen is van vsen olderen . tho
warende iar vnde dach vor alle ansprake / alse en lantrecht is . were ouer dat vse here van Camýn . dit
sùlue dorp . mit synen houen . vnde desse vorbenû=/mede rente den vorsproken armen lûden oder
eren vormûnderen . nicht vorlaten wolde . so scûle wi en dat / leen na holden to truwer hant . were ok
dat wi vorstoruen . so scûlen vse erfnamen den vorbenûmeden armen / lûden vnde eren vormûnderen .
ieghenwardigh vnde tho komende , de lenware na holden tho truwer hant alse lan/ghe dat vse here en
dit dorp . vnde desse rente het . vppe dat alle desse vorsprokene dynk vnde stukke . vnde en eslyk /
truweliken stede . vast vnde ganz gheholden werde . Dar sette wi vore tho borghen mit vns . mit
samender hant / Hinryk mandúuele Jacobes sone . vnde ventzeken van Nemer . vnde wi hinrik
mandúuel Jacob mandúuels / sone . vnde ventzeke van Nemer . bekennen openbare andesser
ieghenwardighen scrift dat wi louet hebben vnde / louen dor der bede willen her hinrikes van der
osten mit samender hant vnde entruwen den vorsproken armen lûden / vnde eren vormûnderen
ieghenwardigh vnde tho komenden . vor alle desse vorscreuene stukke vnde articule . stede vast vn(de)
/ vnuorweldet tho holdende . vnde vor saken aller vtnemýnghe vnde hulpe rechtes gestlykes eder
werlekes . Nyer droghene / vnde vûnde . bedroghene ouer de helfte rechtes geldes . droghene de gift
sake desses kopes . vnde weder ghe(n)nýnghe an en / gantz . vnde aller anderen lûde dar me desse
ieghenwardighe scrift an eme dele oder gantz mach mede breken oder / hinderen . tho ener merer
bethughinghe . so hebbe wi hinryk van der osden Rydder . vnde wi hinrik manduuel / vnde ventzeke
van Nemer vornûmet vse ynghesegel henget an dessen bref . ghegeuen tho plote an den iaren godes /
drútteynhundert andeme achte vnde sostegesteme iare . des sündaghes tho mit vasten .